

# OSLOBODENJE

Objavljeno: 15.10.2018.

## Liftovi u Stupinama “krali” struju 29 godina

U tuzlanskom naselju radnici Elektrodistribucije su tokom zamjene uređaja otkrili da liftovi od izgradnje objekata nikad nisu spojeni na zajedničko brojilo

Liftovi su zapečaćeni početkom oktobra i od tada su izvan funkcije, iako su neki stanari ponudili da se lift privremeno spoji na njihova brojila

Stanari najmanje tri ulaza u tuzlanskom naselju Stupine ostali su bez liftova, jer je Elektrodistribucija Tuzla prilikom zamjene mjernih satova za zajedničku potrošnju otkrila da su liftovi bili spojeni nelegalno, odnosno da se potrošnja električne energije liftova nije računala niti naplaćivala. Stanarima drugog ulaza zgrade B3 u ovom naselju Elektrodistribucija je dostavila i fakturu na iznos od oko 10.000 KM, koju je potrebno uplatiti ukoliko žele da se lift pusti u funkciju.

### Zajednička inspekcija

Stanari ove osmospratnice u Tuzli, u kojoj živi invalid bez noge, te nekoliko starih i teško pokretljivih osoba i porodica sa bebama, ogorčeni su i u potpunosti negiraju da su krali električnu energiju. Kako kažu, najvjerojatnije je da liftovi nisu spojeni na brojilo nikada od 1989. godine, kada je zgrada izgrađena.

- Ovo je Elektrodistribucija otkrila tek kad su skinuli sat. A to je praktično nemoguće uraditi. Druga stvar, apsolutno nije moguće da je neko odlučio ukrasti struju. Ja sam predstavnik vlasnika od 2006. godine i sve vrijeme je, kao i ranije, ormarić pod katancem. Pa, ko bi se upuštao u takvo nešto kad je mjesečni račun za struju koju lift potroši oko 30 KM u ulazu u kojem ima više od 30 stanova? To je marka mjesečno po stanaru, kazao nam je Sead Nurkić, predstavnik etažnih vlasnika u ovom ulazu.

Stanari su u nekoliko navrata pokušali doći do rješenja sa Elektrodistribucijom, ali bezuspješno. Do odgovora u Elektrodistribuciji ni mi nismo uspjeli doći, ali smo nezvanično saznali da je problem zabilježen u nekoliko ulaza ovog naselja, što u ovom trenutku sigurno upućuje i na sistemski propust nakon izgradnje naselja.

Kontaktirali smo i s upraviteljem ulaza, firmom Tehkomerc, iz koje su nam potvrdili da je sve zatečeno “prilikom kontrole koju Elektrodistribucija trenutno provodi”. Napravljena je zajednička inspekcija, a upravitelj je uputio i žalbu prije nekoliko dana, tražeći da se lift pusti u funkciju, te da se problem rješava u hodu.

- Oni su zapečatali cijeli ormarić za zajedničku potrošnju. To praktično znači da mi sad, ukoliko budemo imali neku hitnu intervenciju, ne možemo pristupiti struji u ulazu. Na

katancu je plombirani pečat, koji samo Elektro distribucija smije otpečatiti. Ono što je nevjerovatno jeste da u Elektro distribuciji ne znaju kako je do toga došlo i čija je greška, a kažnjavaju se stanari, rekao nam je Nihad Avdić iz Tehkomerca.

### **Zastarjeli dug**

Stanari ne žele platiti 10.000 KM iz nekoliko razloga. Prvo, smatraju da nisu krivi za propust Elektro distribucije, a drugo zato što smatraju da Elektro distribucija pokušava naplatiti dug koji je zastario i koji je nemoguće tačno odrediti. Oni su ponudili njima prihvatljivo rješenje.

- Ponudili smo da eventualno platimo posljednju godinu, to je nešto više od 300 KM, mada i zbog toga stanari negoduju, ali želimo da osposobimo lift za komšije kojima je on neophodan za svakodnevno kretanje, naveo je Nurkić.

Činjenica da liftovi do danas nisu proradili sasvim sigurno pokazuje socijalnu neosjetljivost Elektro distribucije Tuzla i Elektro privrede BiH, a stanarima nije jasno zašto se lift ne osposobi dok se istovremeno radi na rješavanju problema.

[Miren Aljić](#)